
ШУҲРАТ ҒАНИЕВ: ҲАВЗА СУВ СПОРТИ МАСКАНИГА АЙЛАНТИРИЛАДИ

Фарғона вилояти ҳокими Шухрат Ғаниев бугун Фарғона шаҳар марказидаги собиқ ёшлар сув ҳавзасини бориб кўрди.

- Бетон остида сув кетиб қоладиган “кўз” борлиги учун бу ер мана 6 йилдирки тўлдирилмайди. Аниқроғи сув билан тўлдиришнинг иложи йўқ, - дейди вилоят жисмоний тарбия ва спорт бошқармаси бошлиғи Муроджон Дадабоев.

Узунлиги 280 метр бўлган ҳавза аслида сув спорт турлари билан шуғулланиш учун қулай. Қолаверса у шаҳарнинг қоқ марказида жойлашган. Ёнидан Марғилонсой оқиб ўтади. Дарахтзор, соя салқин хиёбон ҳам унга туташ.

- Мазкур сув ҳавзасини тўлиқ таъмирлаймиз. Яъни ҳавза ён девор ва остки қисмини ойна суюқлиги аралашган махсус бетон билан қоплаймиз. Шунда эшак эшиш, каноэ каби сув спорти турлари билан шуғулланидиган жойга айланади, - деди вилоят ҳокими. - Атроф ҳудуд эса ёшларнинг сайлгоҳи бўлиб қолади.

Сув ҳавзаси ёнида икки қаватли бино, унинг девор билан ўралган ҳудудида 2 та бассейн ҳам бор эди.

- Бу бино сув спорти мактаби таркибига берилади. Ёшлар бассейнларда машқ қилгач, катта ҳавзага ўтишлари мумкин бўлади.

Шухрат Ғаниев шу ерда шаҳар ҳокими Хамиджон Хабибиддинов ва бошқа мутасаддиларга тегишли топшириқлар берди.

Марғилонсой Фарғона шаҳрининг яшил камари. Шунинг учун бундан бир неча йил аввал сой қирғоқларига декоратив тош қопланган. Икки ёнида эса югуриш, сайр қилиш ва велосипедда юриш учун махсус йўлаклар қилинган эди. Соё ёнида жойлашган айрим ташкилотлар бу йўлакларга тегишли майдоннинг бир қисмини ноқонуний равишда ўзларининг ҳудудларига қўшиб девор билан ўраб олибдилар. Йўлакни эса ёввойи ўтлар босиб ётибди.

Вилоят ҳокими Шухрат Ғаниев бу ҳудудлар дарҳол қайтарилиши, ободонлаштириши ва мақсадли равишда ҳақиқий сайлгоҳга айлантирилиши ҳақида мутасаддиларга қатъий топшириқ ва муддат берди.

- Биз бу жойларни албатта ёшларнинг энг севимли масканига айлантираемиз, - деди Шухрат Ғаниев.

Фарғона вилояти ҳокимлиги Ахборот хизмати

2020-08-03 21:12:07